

115 年全國語文競賽臺灣原住民族語言朗讀文章 【卡那卡那富語】 高中學生組 編號 2 號

poisua punarũ canumu

'una kani ucani tatia vʉrunga kurisivatũ na cakũran, tumũpũ canumu.
niaramiri'i sua canumu maripunarũ cu! manguru cau. mata'uru na maraa
manũkapai cimũrũ, nakai 'una canumu kipapa. maka'ũna pa cau manguru
na marũngũcai cimũrũ. makasua arakukunu cu cau mataa marũkurapũ.
monoon na timcara cimũrũ.

mesua 'akia 'apuru, ka'anũ tũni po'ucipi kũkũnũa. cucuru cau
muru'inasũ! cumacũ'ũra na sipara caruru cimũrũ, makai 'una 'inia 'apuru.
matacuvungu cau mataa marũkurapũ makarikari. neni tũni mukusa 'inia
mara 'apuru? mesua kani ia, 'inmamia to'urung pakituru tia mukusa 'inia
mara 'apuru. cucuru kipatũsũ nguain makananguru makacũkũna sipara.
umũnũn kee 'uringi 'apuru na u'ungu. nakai musutavũrũ u'ungu na canumu.
makasua niara kee 'apuru ma'ũpũ cu. maka'ũna cau makarikari, tia cu kita
makananu iaa! marivivini, makasi tapinange urunai, ikuin mingane mukusa
sipara mara 'apuru! ra'isiũn kee 'uringi 'apuru mingane pui'i. vanai sii
nimiaranau rumara'isi 'apuru isua, nimitavu'u ivici in masinang cu!
matarava masini, urunai tamna ivici masinang pa.

macangcangarũ cau musu'ũvũ 'inia. matarava masini,

ikita Kanakanavu putucau pa na urunai tapinange. 'apanapa paracani
musu'ũvũ nguani.

aranai cu mesua, 'una cu cau tamna 'apuru, tũni po'ucipi kũnũa.
nakai 'esi pa 'inia sua miri'i canumu. takacicini vavuru makasi, iku
mukusa 'inia miapacai vʉrunga! nakai tia ku kipapa canumu ma'acunu.
ikamu cau ia, 'urupacao nimũkũa mu 'apakũnũ nanamu maku. vʉrunga isua,
cucuru niara'isi vavuru mamacai cu. nira'akia cu miri'i canumu. aranai cu
mesua, niarakaranana cu capai mamane 'ũani. 'una cu ravatuvatua,
tavukuvukunu, cimũcimũrũ, vanivaniri.

maka'ũnũ cau mataa marũkurapũ makarikari. makasi marũkurapũ, sua
ikamu ia cau, sua ikim ia marũkurapũ. ka'anũ kim manmaan marisauvu na
cau. ka'anũ cu kim tia arakukunu cau cumacũvũrũ. makasua cu, aratũkũnũ
cu mataa cau. sua isi ia, niaranai na Kanakanavu tamna niurina 'ũna.

洪水傳說

傳說，一條大鰻魚倒臥河流上，堵住水流滿出沖刷，人們逃往高山與獸類生活在一起。當時沒有火無法煮東西吃，山羌願意前往取火種，但火種熄滅空手而返。最後是紅嘴黑鵯鳥飛去對岸拿火種！因為咬住火種太久，嘴巴被燙到而變紅迄今。洪水退了，大地的面貌也改變成現在的生活環境。人類與獸類再次討論，動物們說你們是人類，我們是獸類，我們不喜歡聞人類的味道，不要跟人類一起生活，從此，人與獸類就分道揚鑣，語言也互不通了。